

Матфеин 6 бөлг .

1. Эмтнд цаһан санаһарн нөкд болчкад, бийән бичэ эмтнэ нүднд бууляд бээтн, юңгад гихлэ тиим улсиг Бурхн таасшго. Теднд Теңгрин Эцк ачлвр өгшго.
2. Кемр ямаранчн күн эврәннь дурарн болн цаһан санаһарн талдан күүнд юм өгхлэ, бичэ эмтнд соңсхад бээтн. Хойр чирэтэ улс синагогд болн һаза нөкд болсн тускар келэд бийән бууляд бээцхэнэ, юңгад гихлэ тедн эмтн дунд бийән туурулхар седнэ. Үнэр таднд келжәнэв: «Тедн ачвлран ода авчана.»
3. Чи күүнд нөкд болжасн цагт зүн һарчн барун һар ю өгчөхинь бичэ медтхэ.
4. Тегэд чини хээрлэд өгсн юмн нуувч болтха. Цуг нуувч юм үздг Теңгрин Эцк чамаг ачлх.
5. Тадн зальврхларн хойр чирэтэ улсиг бичэ дуратн. Тедн бийән эмтнд үзүлхд дурта болад, синагогмудтан болн хаалһин керчлһнмүдэр зогсад зальврцхана. Үнэр таднд келжәнэв: «Тедн ода белгән авчана.»
6. Чи зальврхларн эврәннь хорадан орад, үүдән хааһад авчкад, Теңгриннь Эцкдән зальвр. Цуг нуувч юм үздг Тана Теңгрин Эцк чамаг ачлх.
7. Тадн зальврсн цагтан талдан келн улс дураһад үлү үг бичэ келтн, Бурхн соңсх гиж санад, үлү үг бичэ келтн.
8. Тедниг бичэ дуратн, юңгад гихлэ тана Теңгрин Эцктн тадниг сурад уга бээтл таднд юн кергтәһинь меднэ.
9. Тадн иигж зальвртн: «Мана Теңгрин Эцк, Тана Нертн эрүн болтха!
10. Тана йосн иртхэ! Тана эвэлтн теңгрт бээснлэ эдл һазр деер бүттхэ!
11. Эндр өдр маднд кергтэ өдмг өгтн!
12. Бидн яһж эмтнэ килнцинь тэвнэвидн, тиигж Та мана килнциг тэвж өгтн.
13. Бичэ мадниг сөрдг юмнла харһулыт, хар чидлэс гетлгит. Яһад гихлэ, Тана

Йосн, Тана чидл, Тана туурмж мөңкинд! Тиигтхэ!»

14. Кемр тадн эмтнэ геминь болн буру йовдлмуднь эс тэвхлэ, тана Теңгрин Эцк бас буруһитн тэвшго.

15. Кемр тадн эмтнэ геминь болн буру йовдлмуднь эс тэвхлэ, тегэд тадниг Тана Эцк буруһитн болн гемитн бас тэвшго.

16. Бурхндан иткдг болн бийэн нерэдсн улсла эдл бичэ болтн. Тедн Бурхндан өдр нерэджэхэн үзүлхэр, һундлта чирэхэрн эмтнд медүлнэ, хот уулго, зальврад, Бурхндан өдрэн нерэднэ. Тегэд тадн Бурхндан нерэдсн өдрмүдтэн хойр чирэтэ улсиг бичэ дуратн. Тедн болхла һундлта чирэхэн эмтнд үзүлэд, Бурхндан өдр нерэджэхэн медүлхэр седнэ. Би үнэр келжэнэв: «Тедн эврэннь ачлвран ода авчана.»

17. Бурхндан өдрмүд нерэджэсн цагт, чи толһаһан тослад эврэннь чирэхэн уһаһад,

18. эмтнд биш, нуувч юм үздг, Теңгрин Эцкдэн өдрмүд нерэджэхэн үзүл. Тегэд нуувч юм үздг чини Эцк чамаг ачлх.

19. Һазр деер зүсн зүүл байн зөөр бичэ цуглултн. Зев болн гүр тедниг үрәжэнэ. Хулхачнр һазр малтад хулхална.

20. Зөөрэн Теңгр деер хуратн. Тенд зев чигн, гүр чигн үрәшго, хулхач һазр малтж хулхалшго.

21. Юңгад гихлэ зөөрэн хадһлсн ормд тана зүркн бээнэ.

22. Тана нүднтн – тана цогцин герл. Нүднт цевр болхла — тана цогцтн чигн цевр болх.

23. Кемр тана нүднтн цевр эс болхла, тана цогцтн чигн хар болх. Чамд бээсн герл хар болхла, тегэд харңһу ямаран бээдлтэ болх?

24. Нег чигн күн хойр эзнд церглж чадшго. Яһад гихлэ негнднь дурго болад,

хойрдгчднь — дуран өгх. Эс гиж негнь дөңнэд, хойрдгчнь төртөн авшго. Тадн Бурхн мөңгн хойрт хамднь церглж чадшгот.

25. Тегэд Би таднд келжэнэв: « Ю идхэн, ю уухан, ю өмсхэн хээһэд бичэ зовтн. Тана седкл хотас деер биший? Цогц — махмудтн хувцнас деер биший?

26. Теңгрт нисдг шовудиг хэлэхнтн. Тедн тэрэ чигн тэрж өскхш, буудя хурадг ормд цуглуулхш, тана Теңгрин Эцк тедниг асрад бээнэ. Тадн теднэс үнтэ болн деер.

27. Кен чигн күн бийэн кедү килмжэд хэлэв чигн, нег тоха үлүһэр өслтэн немж чадхий?

28. Хувцна тускар юңгад зовад бээнэт?

Кеер урһдг цецгэс хэлэхнтн. Тедн көдлхш, хувц уйж түржэхш.

29. Би иигж таднд келжэнэв: Соломон хан ямаран туурмжта бээсн бийнь теднлэ эдл сээхн хувцн уга билэ.

30. Тегэд теегт урһжах цецгэсиг, маңдур хумхарад бешт хайгдж одх ноһаг, Бурхн тиим сээхн бээдлтәһэр кежәхлә, баахн итклтэ улс , тадниг түүнэс үлүһэр өмскх.

31. Тегэд тадн ю уухан, ю идхэн, ю өмсхэн? - бичэ хээтн, бичэ зовтн.

32. Терүнэ тускар келн-эмтн зовад бээцхэнэ. Зуг тана Теңгрин Эцктн таднд юн кергтәһинь меднэ.

33. Тадн түрүлж Бурхна йос болн Терүнэ чик үнинь хээцхэтн. Цуг наадк юмнь таднд немгдэд бээх.

34. Тегэд маңдур «яахмб»- гиж бичэ зовад бээтн. Маңдурк өдр бийнь бийэн олх. Өдр болһнд эврәннь килмжлһн бээдмн.